



LINYON

Piblikasyon Linyon Demokratik Seselwa

Vol. 4

No. 1

Le 8 Fevriye, 2019

I annan progre kont koripsyon *Kantmenm Sa, Fodre Ranforsi Travay*

LDS i determinen pou kontinye son travay kont koripsyon. I pa pe kapab anmenn dimoun an kour pour bann lofans. Sa pou vwar i reste dan lanmen lapolis e biro Atorni-Zeneral. Nou pe travay ki byento Komisyon kont Koripsyon i a ganny sa pouvwar asi.

Me travay LDS dan lasanble pe port fri e sa fodre rekonnèt. La derwa lekzanp resan ki prouv sa pwen.

● Bidze i pli byen regle. I kler ki bann minister e departman gouvènmàn i pli konsyan lo nesite gard kont byen. Dan sesyon lo Bidze 2019 e dan FPAC sa semenn nou'n tann plizyer Zofisye



Kont Piblik ki'n dir zot in amelyor lafason ki zot gard kont. Rapòr Oditer-Zeneral in konfirm sa.

● Pozisyon Sesel lo 'Corruption Perception Index' in mont par 11 pwen dan sa dernyen 2 lannen e 'Transparency International' i dir sa

akoz Lenstitisyon for. Sa i kontribisyon LDS.

● L'Union Estate in rapòr en profi R10 milyon pour lannen 2018 - en rezilta remarkab konpare avek bann lannen avan. Sa i akòz lanket FPAC ti tir bann move pratik e refer sa lakonpani.

I annan ankòr ka kot Lasanble pe fer lenvestigasyon pour devwal koripsyon ki'n arive e pour demann aksyon. Sa lannen nou ekspekte ki serten ka i komans al devan lazistis.


Me travay pankor fini e nou pou kontinyem ziskan ler Sesel i annan en sistenm finans piblik ki prop e kot napa nanryen ki kasyet. Kont lo nou!

Nou esper aksyon lo rapòr lo 'Sea-Horse'

An Out lannen pase, zistwar 'Sea-Horse' ti sok tou Seselwa. Sa bato kargo ti pran dife lo mouyaz devan Coetivity, e apre ti drive e koule dan lanmer profon. Kat manm lekipaz ti disparet, prezimen mor.

En lanket dan sa lensidan in trouv plizyer defo e neglizans lo lapar bann lotorite e lazans ki ti responsab pour manyer sa bato ti'n ganny servi e manyer loperasyon sekòr ti deroule apre aksidan.

Parmi bann lotorite e lantrepriz ki ti enplike i annan IDC, Departman Prizon, SEPEC, Lazans Sekirite Maritim SMSA e Coastguard. Rapòr fer par Bord pour Investigasyon Aksidan Maritim (MAIB) in blanm sa bann lazans



pour bann defo e fot grav. Me apre, IDC in vin devan pour kestyon serten lobzervasyon dan sa rapòr.

La nou annan en sityasyon kot bann lotorite e bann lazans pe kestyon travay enn ek lot. Zot pe sey pas blanm ek kanmarad.

Wi, nou le konn laverite lo sa ki ti arive avek 'Sea-Horse' e lekel ki responsab. Me i annan keksoz pli enpor-

tan. En aksidan trazik in arive, e 4 zom in perdi zot lavi. Zot fanmir i ankòr pe soufer e nasyon antye i an dey. In annan fot e fodre korize.

Bann lazans i devre premye get zot par dan responsabilite e aprann lesòn ki i annan dan sa trazedi. Bokou keksoz in al mal. Si zot pa akseptè e pran aksyon nesaser, aksidan pou ariv ankòr e sa nou pa oule. Apre rapòr lenvestigasyon i bezwen annan desizyon e aksyon.

Fer nou tande ki bann lotorite pe fer pou koriz zot fot. Nou le tande ki pli bon pratik sekirite pe ganny met an plas.

Sa ki nou pa oule se ki sa trazedi i pas san rezilta konkret pou fer keksoz pli byen.

Trafik imen dan nou pti Sesel!

Protez limaz nou pei

LDS I demann latansyon serye e aksyon konkret lo size trafik imen dan Sesel, apre bann ka ki'n ganny revele resaman.

Trafik imen I en vilen term ki gat repitasyon en pei. I nesese ki nou pa les limaz Sesel ganny terni par okenn pratik ki tonm anba sa term. Alor, fodre ki tou nou bann lotorite I pran kont lo bann ka resan, e al en pe an aryer pour koriz sa ki'n al mal.

Sityasyon ki'n ganny revele pour nou I an koneksyon avek travayer etranze. Ozordi, pei i bezwen travayer etranze aköz nou napa ase mendev Seselwa. Me fodre lanplwa travayer etranze i ganny byen regle e kontrole.

Avek mank kontrol, serten zofisyse gouverman in profite pour fasilite lanplwa travayer ilegalman. I tris pou war nou zofisyse piblik in ganny enplike dan sa kalite koripsyon kan i annan bokou latansyon lo sa problem e zefor pe ganny fer pour netwaye.

Nou'n war ki ti napa kordinasyon ant Minister Lanplwa e Departman Limigrasyon, sa de lotorite ki konsernen. Sa i en defayans ki nou'n war souvan dan bann ka resaman.

Annou rezourd sa kalite problem! Nou kapab!

I nesese ki I annan en resansman lo bann etranze ki lo permi travay pour fer sir ki napa lot sityasyon ki nou pankor war. E Gouverman I bezwen revwar bann prosedir pour anpes okenn ka ilegal. Bann tel lenstans koripsyon nou bezwen eliminen. I annan plizyer konsekans ki nou bezwen evite e limaz Sesel I tro enportan pour nou les ale.

Stasyon Petrol Victoria Nor Pankor Ouver : Aköz?

De mwa pase, SEPEC in anonse ki son stasyon petrol Victoria Nor in komplete. Me i pa kapab met sa fasilite an servis aköz napa akse.

Sa i en sityasyon ki koz bokou fristrasyon pour piblik Seselwa e nou pa konpran aköz sa in kapab arive.

Dapre leksplikasyon ki'n ganny donnen, in napa koordinasyon avek lezot lazans gouverman pou aranz akse. Me pourtant sa stasyon i zis lanmenm lobor semen piblik e i annan en baro ki al direkteman ladan.

I pa rezonab ki sa stasyon in ganny fer san okenn plan pour koneksyon-avek semen e i pa rezonab ki i pou pran trwa mwa pour fer sa ki nesese. Bann lotorite gouverman pe zis pini



piblik Seselwa.

I annan en gran neseseite pour sa fasilite. Trafik lo semen dan Victoria i toultan en problem e konmela dimoun ki reste dan Nor Mahe, depi Rivyer Anglez ziskan Glacis, i bezwen travers lavil pour al pran petrol lo stasyon Roche Caiman. Sa servis limenm i konble dan serten ler, sirtou kan dimoun pe al kot zot apre travay. I nesese ki sa sityasyon i rezourd san plis retar. Apre tou sa depans larzan piblik, aret fer keksoz difisil.

Msye Faure e parti US dan letarzi

Depi sa gran sanzman non pou sorti Parti Lepep, nou pa'n tann gran soz lo parti United Seychelles. I paret ki apre sa lekzsis sanz non, zot in fatigue e bezwen repoze pour kalkil zot 'next move'. Nou aprann ki plan se pou re-organiz striktir parti dan bann distrik, me difikilte se ki personn napa konfyans dan sa parti apre tou sa laverite ki zot ti pe kasyet in ganny met deor. Sa de-trwa dimoun ki ti vin kongre in war zot tou sel.

De son kote, Msye Danny Faure pe brouy labou lo son relasyon avek US. Apre ki in ede anmenn zot dan sa petren, l'n fer kwar ki in divorce, e apre in anonse ki I SPUP orizinal. I pe zwe de kote e Seselwa pa konpran kote I ete ekzatemman. I pe zis distans son lekor avek son pase dan Parti Lepep.

Koman Prezidan, Msye Faure in tonm dan letarzi. I annan plizyer prob-

lenm lo latab, tel ki bann size koripsyon, later gouverman ki'n ganny pran par son bann dalon, e bann minister ki pa pe rezourd peoblenm ki zot annan.

Aksyon prensipal ki nou'n war Prezidan pran, se sanz pozisyon bann minis e bann o-zofisyse. I pe touzour rod en ran pli o pou met son bann favori me I menm dimoun toultan.

Nou komans war Msye Faure preski tou le zour lo televisyon. En zour I pe donn promosyon, en lot zour I pe resevwar anbasader e pour en sanzman I pe vizit en distrik. Tou sa la I routin dan travay Prezidan, me I zis seremoni. I ancor pa pe konfront son vre latas, setadir met lord dan nou sistenm gouverman.

Parti US ek Msye Faure I dan sonmnlans. Nou a espere ki I annan nouvo dan diskour leta lanasyon.